

ni algunos le muevan o quieran mover, ni le enbargades ni le tomedes ni consyntades enbargar ni tomar sus bienes ni parte dellos por quanto mi merçed es que sy alguno o algunos alguna accion o demanda con él entendiere aver que lo demanden por ante los mis alcalles de la mi corte e los oydores de la mi audençia, o por ante qualesquier dellos ante los quales yo mando al dicho Pero Garçia que les responda e cunpla de derecho, e los unos e los otros non fagades ende al por alguna manera so pena de la mi merçed e de veynte mill maravedis para la mi camara a cada uno por quien fincar de lo asy fazer e conplir, e demas por qualquier o qualesquier de vos por quien fincar de lo asy fazer e conplir mando al ome que vos esta mi carta mostrare o el dicho su traslado signado como dicho es, que vos enplaze que parescades ante mi en la mi corte, los conçeios por vuestros procuradores, e uno o dos de los ofiçiales personalmente del dia que vos enplazare a quinze dias primeros siguientes sola dicha pena a cada uno a dezir por qual razon non conplides mi mandado, e de como esta mi carta vos fuere mostrada o el dicho su traslado signado como dicho es, e los unos e los otros la cunplieredes mando sola dicha pena a qualquier escrivano publico que de ende al que vos la mostrare testimonio signado con su signo porque yo sepa en como conplides mi mandado.

Dada en Toledo, dos dias de Enero año del nasçimiento de nuestro Señor Ihesucristo de mill e quatroçientos e ocho años. Yo Pero Garçia la fiz escribir por mandado de mi señor el Infante, tutor de nuestro señor el rey e regidor de sus regnos. Yo el Infante. E en las espaldas de la dicha carta estavan escriptos dos nonbres a dezir el uno, yo el condestable y el otro, Gomez Manrique. Registrada.

L

1408-I-9, Alcalá de Henares.— Juan II al Concejo de Murcia ordenando que hagan bizcochos y pan con el trigo que le corresponde de sus tercias. (A.M.M. Cart. Real 1391-1412. fols. 34v-35r.)

Don Iohan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; al conçeio, e alcalles, cavalleros, escuderos, e regidores, e ofiçiales, e omes buenos de la muy noble çibdat de Murçia, e a los terçeros, e mayordomos que cogedes e recabdades en renta o en fialdat o en otra manera qualquier la mi parte de las terçias desa dicha çibdat del fruto del año que paso de mill e quatroçientos e siete años, e a qualquier o qualesquier de vos a quien esta mi carta fuere mostrada, salut e graçia.

Sepades que es mi merçed que todo el pan de trigo que a mi perteneçen de



la mi parte de las terçias desa dicha çibdat del dicho fruto del año pasado de mill e quatroçientos e siete años, que se faga vizcocho en esa dicha çibdat de Murçia para que lo lieven a la çibdat de Cartagena para mantenimiento e refrescamiento de las mis galeas que andan e anduren por la mar en la guerra contra los moros quando vinieren a la dicha çibdat de Cartagena, por lo qual es mi merçed de mandar e encomendar a Lope Gonçalez de Toledo, mi escrivano, vezino desa dicha çibdat, que tomen e reçiban e recabde por mi nonbre todo el trigo que a mi pertenesçen de las dichas terçias este dicho año e lo faga amasar e cozer en la dicha çibdat para el dicho vizcocho, como dicho es.

Porque vos mando, que luego en punto, vista esta mi carta, recudades e fagades recudir al dicho Lope Gonçalez de Toledo, mi escrivano, con todo el dicho pan de trigo que a mi pertenesçen de la mi parte de las dichas terçias desa dicha çibdat del fruto que paso del dicho año de mill e quatroçientos e siete años, por que lo faga luego amasar e cozer para el dicho vizcocho e lo faga levar a la dicha çibdat de Cartagena, como dicho es.

E otrosy, es mi merçed que dedes e paguedes e fagades de dar e pagar luego al dicho Lope Gonçalez tres mill de los maravedis que rindiere la dicha mi parte de las dichas terçias que a mi pertenesçen desa dicha çibdat, syn el dicho pan de trigo deste dicho año, porque los gaste e despienda en fazer amasar e cozer el dicho vizcocho por quanto asy cunple a mi serviçio.

E otrosy, es mi merçed que le dedes e fagades dar e desenbargar luego los fornos que vos dixere e ha menester en esa dicha çibdat para cozer dicho vizcocho, pagando por ello su derecho razonablemente, e tomad su carta de pago del dicho Lope Gonçalez de todo el dicho pan de trigo que le dierdes e fizieredes dar de la dicha mi parte de las dichas terçias, de los dichos tres mill maravedis, e con ella e con esta mi carta mando que vos sea reçebido en cuenta todo el dicho pan de trigo que paresçiere que reçebio de vos.

E otrosy, los dichos tres mill maravedis e non fagades ende al por alguna manera, so pena de la mi merçed e de diez mill maravedis a cada uno de vos para la mi camara, asy non sed çiertos que sy vosotros quedare de non fazer e conplir todo lo en esta carta contenido, e algund deserviçio o dapno me viniere por ello, que a vos e a vuestros bienes me tomare por ello.

Dada en la villa de Alcalá de Henares, nueve días de Enero, del año del naçimiento del nuestro Señor Ihesuchristo de mill e quatroçientos e ocho años. Yo Ferrant Gonçalez de Setien la fiz escrivir por mandado de nuestro señor el rey.

